



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Pakistan northwest tsütsü
telungpuri police 10 tepset

Ajinkya Rahane international
cricket asaya nungi anisüngzüker



VOL. XXIII ISSUE NO. 288 (ADOK 288) DIMAPUR ROGONÜ (FRIDAY) CHITENI (JULY) 31, 2026

₹ 5.00

August 1 nungi Chümoukedima nung SUP mamshitsü



Dimapur, Chiteni/July 30 (TYO): Libajen wazüka ayutsü asoshi tongtipang mera agiba rongnung ka ama, Deputy Commissioner, Chümoukedima, Polan John, NCS ajanga August 1, 2026 nungi tenzüka Chümoukedima district nung Single-Use Plastic (SUP) items aser single-use plastic bottles tem mamshitsü totuyuba agütsüogo.

Iba totuyuba ya single-use plastics tem tapi agi amshiba ajanga libajen menenba aser raksatsüba azüoktsü mechi Home Department, General Administration Branch ajanga taoba mapang metetdakja aliba den bhusema agütsüba alitsü.

Tang rizünga alibatam azüngtettsü mechi iba totuyuba

agütsüba anogo nungi tenzüka hopta asem asoshi talenba salaa alitsü aser iba sülen district tesem ajungalen özüng shidak amshitsü, ta ashi.

Iba totuyuba nung nokdanga aliba osettem nungya plastic carry bags den plates, cups, forks, spoons aser straws ama plastic cutlery, thermocol products, polythene, nylon, PVC, polypropylene aser polystyrene osettem, sorkar indang sentong nung amshiba flex banners aser posters, balloons atema amshiba plastic sticks aser flags, plastic trays, wrapping and packing films, 100 microns dang tajemba PVC banners, senden, sentong, seminar aser jurila atema amshiba packaged drinking water bottles litres 20 dang tajemba ajunga alitsü.

Deputy Commissioner-i Heads of Offices, Area Administrative Officers, Chümoukedima Town Council, District Task Force aser tanga ketdangsürtem dang iba totuyuba nung shidak anidaka nüburtem nem iba tenokdangba indang awareness agütsütsü totuyuba agütsüogo.

Mizoram nung arogo temi FCRA amendments anema longkak aittsü

Aizawl, Chiteni/July 30 (Agencies): Mizoram nung Khristan denominations balala lungjemer kumtetba Council of Churches in Mizoram (CCM) ajanga Foreign Contribution (Regulation) Amendment (FCRA) Bill, 2026 anema August 11 nü Aizawl nung longkak aita jajaba sentong ka ayongzüoktsü.

Brehostibarnü Aizawl Press Club nung osangbener senden ka nung jembidang, benoktsü aliba legislation nungya provisions kari bendang lima nungi teyari agiba arogo aser lokti tem dak kanga mejungi kongshitsü, ta CCM ajanga ashi.

Iba longkak aitba sentong nungya CCM küboki maitba arogo aser voluntary organisations tem densema arogo ajak jaoktsü, ta CCM tir Rev. R. Lalbiakliana-i ashi.

Iba özüng temelenshi benoktsü aliba nungya özüng tajunga kar lir, saka metokmeperia aika lir, ta pai ashi.

CCM nungya Mizoram Presbyterian Church, Baptist Church of Mizoram, Evangelical Church of Mizoram, Lairam Isua Krista Baptist Church, Evangelical Free Church of India, Isua Krista Church, Independent Church of India, Wesleyan Methodist Church of Mizoram

asere Zomi Baptist Church dena lir.

Iba özüng nungya bendang lima nungi senotsü teyari aruba ajanga linük tejangraba nung mekongshitsü aser ochishia amshitsü indang shia lir. Ajisüaka Mizoram nung aliba arogo tentet ajanga ashiba agi, iba özüng yagi bendang lima nungi teyari agütsüba nung metaloka aliba arogo tem aser tamangba yimsü nung amendaka aliba lokti tentet tem inyakyim nung kongshitsü akok.

State nung iba Bill benoktsü alima anema nokdaker tali akumer. July 26 nü Baptist Church of Mizoram ajanga iba özüng atema sarasadem sentong ayongzüka liasü.

Foreign Contribution (Regulation) Act yagi bendang lima nungi teyari agütsüba senotsü tem India nung kija, lokti aser non-governmental organisations temi agizükba aser amshiba azüoker.

Foreign Contribution (Regulation) Amendment Bill, 2026 ya tang Parliament indang Monsoon Session mena aliba mapang benoktsü imlar, aser August 11 nü longkak aittsüba ya Mizoram nung arogo tentet tem lungjemer yimjak nung longkak aitba mezüngbuba alitsü.

Arunachal aser Nagaland MPs temi PM Modi den tzümetsüng tebilemstsü lemsatep



Arunachal Pradesh aser Nagaland nungi Parliament nung züngsemtemi Brehostibarnü New Delhi nung Ato Kilonser Narendra Modi den ajurutepdang tangokba noksa nung angur.

New Delhi. Chiteni/July 30 (TYO): Brehostibarnü India Ato Kilonser Narendra Modi-i, Arunachal Pradesh aser Nagaland nung tzümetsüng adokba ajanga timtem ajuruba nung yariteptsü asoshi Centre-i state ana sorkar den külemi mapa maneni inyaktüsü, ta ashi.

Arunachal Pradesh aser Nagaland nungi MPs telok ka den ajurutepba sülen Modi-i iba o ya ashi.

"Arunachal Pradesh aser Nagaland nungi MPs tem den senden ka amen. Item state nung tzümetsüng adokba sülen tensa balala indang onoki jembi. Timtem koktettsü asoshi state

sorkar tem den Central sorkari maneni inyaktüsü. Nisung ajak anema aser kumzüka alitsü atema sarasademtsür," ta Modi-i social media X nung ashi.

Iba senden nung Parliamentary Affairs Minister Kiren Rijiju-a aden aser ato kilonseri MPs tem dang akok tashi yaritsü ta shiogo aser mapang shidak nung teyari agütsütsü atema nüngdakba totuyuba agütsüogo, ta ashi.

"Arunachal Pradesh & Nagaland nungi Members of Parliament temi PM @narendramodi ji den Parliament House, New Delhi nung ajurutepa pa dang state ana nung

tzümetsüng tensa indang lemsatep. PM-i teyari ajak agütsütsü ta ashi aser mapang shidak nung teyari agütsütsü atema nüngdakba totuyuba tem agütsüogo," ta Rijiju-ia X nung ashi.

State anaprong nung tzünglu kanga sashia arua alinen aluba ajanga nisung takum samaba aser ki o jen raksaba lir.

Nagaland aser Assam shilem kar nung tzünglu kanga sashia aruba ajanga Assam nunga district asem nung tzümetsüng tesashi adoka nisung 70 dak tema süogo aser nisung lakh asem dak tema timtem ajurua ano tesem aika tzü agi metsüngbanger lir.

AHoDs aser HoDs senden nung state terenkok atema jembi

Dimapur, Chiteni/July 30 (TYO): Nagaland Chief Secretary, Sentianger Imchen, IAS mendenpuba sür Administrative Heads of Departments (AHoDs) aser Heads of Departments (HoDs) senden ka Secretariat Conference Hall, Nagaland Civil Secretariat, Kohima nung July 29, 2026 nü mena liasü.

Iba senden nung Home Commissioner, Abhijit Sinha, IAS ajanga Independence Day amungtsü atema renemshiba reprangshima state level sentong atema department balala nem mapa nunglokja aliba asadanga liasü.

Küm ishika Independency Day sentong nung sorkar mapa inyaker kanga ajema shilem agiba mechi Sinha-i Administrative Heads of Departments aser Heads of Departments tem dang ketdangsür aser staff ajak arua adentsüsa mera agitsü shia liasü. Sentong tembangba sülen department ajaki attendance report agütsütsü, ta pai metetdaktüsü.

Sorkar indang Plastic Free and Green Office Initiative atema jembidang Sinha-i sentong balala nung department temi single use plastic akok tashi mamshitsü merangtsüba indang nenshia ashi.

Pai department ajunga dang iba mera nung shidak anidaktüsü aser plastic maliba sorkar offices kumdaktüsütsü asoshi teka amteper inyaktüsü ayongzüka liasü.

Chief Secretary, Sentianger Imchen, IAS-ia department ajunga dang plastic-free asoshi sentong yanglur mapa kuma inyaktüsüla aser ibaji Nagaland Civil Secretariat nungi tenzüoktsüla, ta ashi aser department tem dang tatishitsü tajung sayua libajen kumzüka ayutsüba mapa tem inyaktüsü ajungshia liasü.

Finance Commissioner, Kesonyu Yhome, IAS-i State SMA balance account indang lemsatep aser Nagaland nung department balalai inyakra SASSI projects tem jenjang asadanga liasü.

Iba senden nung Secretaries shilem aser teinyaktütem den departmental service rules indang presentation ka Personnel & Administrative Reforms (P&AR) Department ajanga agütsü.

Principal Secretary & Development Commissioner, Y. Kikheto Sema, IAS ajanga department ajunga dang State Plane kübok Calendar of Action nung aliba ama inyakyim ajak mapang shidak nung renemtsü ayongzüka liasü.

Secretary and Chairperson, Comprehensive Manpower Rationalisation Committee, Akubu Meyase, IAS ajanga comprehensive manpower rationalization nukjidong aser tangatetba lemsatep aser sorkar indang department tem nung human resources akok tashi tajungtiba nung amshitsü tongtipang lir ta ashi.

Iba senden nung tongtipang onük balala benoka jembi aser senden nung adener temi pei tebilemba aser shisatsü lemsatepa liasü.



Otsüla oboula nunger mapang Tsüngremmong amongtsü jelia pei kiojen, kima-yimtung, alu aser tzübo lenmang aser yim temeket ajak merükteta ayuba sobaliba tajung, tanü putu nunga Aotsür Aor alidak tesem nung wazüka benschitsü asoshi taküm 2026 küm July 30 anepdang 5:30 ako nungi Dimapur nung Signal Angami yimtak alir Aotsür Aor ajak yimkong nübodoka yim lendi aser temeket merükteta Tsüngremmung Social Work inyakba noksa nung angur. Iba "2026 TSÜNGREMMONG SOCIAL WORK" sentong ya Aor Telungjem Signal Angami Village Dimapur (ATSAD)-i ayongzüka liasü. Dimapur nung Angami Signal yimtak Aor kilen meyi junga kümogo. Tanü yimkong Tsüngremmung nübodok nung Aotsür Aor ajak mulungsua arua shilem agiogo. Iba sentong tenzüka Rev. Ariba Imchen-i sarasadem aser mapa temer ATSAD tir Wb.Limatangit Lemturi yimkong dang pelaba o ashi, Rev. N. Tzüdiri sarasadem aser yimkong Tsüngremmung shi mayonga süngo jemer senshi. Tang nungi iba Tsüngremmung Social work ya küm shia inyakba sobaliba, annual event, ka küma ayongzüka akatsü bangjemteper senshi. Tanep mapa inyakba mapang tepiyong tzünglua maru, anüa mapu Tsüngremi Pai meimba nübortem kanga yariogo. Iba ama sobaliba tajung agi alima sangwadakja Aor telungjem akangshidaktsüba angur.

Dr. Yhome-i Kohima mereka ayutsü atema khuret abentsü ayongzü

Dimapur, Chiteni/July 30 (TYO): Kohima District Planning & Development Board (DPDB) senden July 29 nü Deputy Commissioner & Vice Chairman, DPDB Kohima, B. Henok Buchem, NCS lenisüba nung menogo.

Advisor for School Education, & Chairman of the Kohima DPDB, Dr. Kekhrielhoulie Yhome-ia iba senden nung shilem agia liasü.

Lenmang aser municipal area tem kisüjensü dang amshiba oset bendendak tesem ama aser shishilemba balala atema amshiba süoki ia bilemba lemsatepba mapang Dr. Kekhrie-i, lenmang ya jana bendendak ama mamshitsü aser atsünga marutsü atema tenokdangba agütsütsü nüngdakba lemsatep.

Kohima jila nung kilentsü dak sendakba nung tebilemtsü aliba indang jembiba mapang Dr. Yhome-i, jila mereka toktsütsü atema lokti-i shilem agütsü nüngdaker ta ashi. Paisa, sanitation taah agidar, saka dokan kibur aser jila nung alirtemi kilentsü aser pei

temeket mereka ayutsü atema khuret abentsü ta ashi.

Terenlok maparen balala indang sensaksemba mapang Dr. Yhome-i, department ajak dang scheme, project aser nüburtem ajangzükdaktsütsü atema maparen balala benoka inyakba indang osang tejangja agütsütsü mepeshi, ajita asünungdang osangtem ya kanga junga bendener mangaoka yutettsü aser iba ajanga inyakyim temerekba kümdaktsütsü aser sorkar inyakyim idang nüburtem nem tali tajungba metetdaktsütsü, ta ashi.

Senden nungsa Chief Executive Officer, Kohima Municipal Council (KMC), Alemyapang Longchar, NCS-i, Kohima nung Solid Waste Management Rules, 2026 benoka inyakba indang metetdaktsü.

Longchar-i SWM Rules nung tongtibang provision tem indang jembiba, kong jana bendanga bendenba, kishiai tua jana bendenba, recycling aser reuse, scientific landfill management aser kimayimtung

nung jana entokba inyakyim toktsütsüba densema lir.

CEO-isa, Refuse-Derived Fuel (RDF) indang metetdaktsü, koba non-recyclable waste nungi yanglua cement plants aser waste-to-energy facility amala nung amshir.

Maneni Deputy Commissioner, B. Henok Buchem-i, department ajak dang parnoki benoka inyaka aliba mapa balala indang osang tejangja agütsütsü tetuyuba agütsü. Census House Listing Operations dak sendakba nung tang media balala nung osang prokshia aliba dak sendakba nung pai sorkar tenzüker ajak dang census ketdangsürtem den teka amteper inyaksü ajungshia liasü. DC-isa, lenmang sector dak sendaka aliba stakeholder department ajak dang tzüngluruwa mapang lendong balala ataloktsü ana nung aliba atema renema atatsü mepeshia metetdaktsüogo.

Senden nungsa Kohima District Planning & Development Board züngsem tasen pongu pelashishia agizüka liasü.

Director of Census Operations-i Principal Census Officer semdang

Dimapur, Chiteni/July 30 (TYO): Director of Census Operations, Nagaland, Dr. Kenei Miachio, IFS-i, Deputy Commissioner & Principal Census Officer, Kohima, B. Henok Buchem, NCS den July 29 nü Deputy Commissioner Office, Kohima nung ajurutepogo. Senden nung Kohima district Charge Officer temia shilem agia liasü.

Senden nung Dr. Kenei-i, district nung tang benoka inyaka aliba Census operations takok ngua inyaktettsü ta temulung lema bilemba lemsatep, kechiyong inyakyim nung sendaka aliba

ketdangsürtem ajak tetemsü aser pei mapa asoshi bendanga agütsür lir, ta ashi. Paisa, Census ya koda tongtibang iba indang kanga junga rasa shira Nagaland nung aliba nüburtemi iba inyakyim angateter aser teka amteper inyaker ta ashi.

Sorkar tenzükertem dang Census inyakyim takok ngua inyaksü atema nendaka inyaksü mepeshia, pai iba mapa takok ya ketdangsürtemi bendanga agüja inyakba aser ajak teka amteper inyakba dak keta lir ta ashi.

Kenei-i ashiba agi, tang tashi nung bendener aliba data ya imla aliba den kasashi dang

lir aser data kanga junga asadangtsü asoshi Charge Officer tem khuret asütsü.

Census inyakyim nung teyari agütsüba atema Director-isa, Deputy Commissioner B. Henok Buchem dang kanga pelaba lemsatep. Talisa, pai iba inyakyim atema mejeta helpline ka amenokba atema tenüngsang agütsü.

Paisa, Deputy Commissioner-i district jenjang nung tenüng asadangtsü langa maparen aika benoka inyakogo, aser iba ajanga Directorate mapa tepungbaba kümdaktsüogo, ta ashi.

Kohima DC-i ASF azüoktsü jenjang agiba metetdaktsü

Dimapur, Chiteni/July 30 (TYO): Kohima district kübok Rütsie, P. Khel, Kohima yimtsüng aser Mezoma yimtsüng nung African Swine Fever (ASF) poktetba jangjaba sülen Deputy Commissioner, Kohima, B. Henok Buchem-i tetuyuba kar agütsüogo.

Osang ajanga ashiba agi, Office of the Chief Veterinary Officer, Department of Animal Husbandry and Veterinary Services nungi positive laboratory test report agizüka sülen iba tashidak poktetba jangjaogo.

Iba dak sendakba nung tashidak pokteter aliba tesem telongtet km 1 Infected Zone ta sangdongogo aser iba tesem telongtet km 10 ya Surveillance Zone ta sangdongogo.

Tetuyuba ajangsa Infected aser Surveillance Zones temi ak taküm mesüra akshi bener maotsü mesüra bener metugutsü tenokdangba agütsüogo. Iba tesem telongtet nung aliba akshi ayokdak ajak

shibanga atatsü tetuyuba agütsüogo.

Ak metsürtem dang ak metsüba tesemi tesemdanger marudaktsütsü, ak ki aser temeket mapangshia disinfect asütsü aser ak shirangba mesüra asüba indang osang Department of Animal Husbandry and Veterinary Services nem metetdaktsütsü tetuyuba agütsüogo.

Tetuyuba nungsa ak tasü official inyakyim sülen anidaka entoktsü aser ayong mesüra moapu nung tasüangtem mintoktsü metetdaktsüogo.

Maneni nüburtem dang kümküma alitsü aser mejangjaba tesem nungi akshia ali machitsü metetdaktsüogo.

Deputy Commissioner-isa, tetuyuba sülen manidakertem Prevention and Control of Infectious and Contagious Diseases in Animals Act, 2009 aser tanga temzüng ozüng dak ajemdaker merenshitsü ta metetdaktsüogo.



July 29 nü Mokokchung Penli Ward nung anentsüh tulu alua iba lendong nung nisung ana taküm sama. Lendong atalokba tesem nung July 30 nü kiyong-kinar aser lokti balala nungi temeimer aika adenshia yaritepba mapang tangokba noksa nung angur. Tasüsang anaji Alisopur nunger Queen Mary Hr. Sec. School Mokokchung nung azünger teti o tenu na liasü.

Gorkha Public Panchayat Kohima-i asükhu lemsatep

Dimapur, Chiteni/July 30 (TYO): Gorkha Public Panchayat Kohima-i sangdong ka ajanga Livingstone Foundation International, Dimapur ngutetsang aser Administrator Arthur

Edwards asüba osang angazüka temulung koremba lemsatepogo.

Arthur Edwards ya educationist, mentor aser aria bilem agi sünga aliba nisung ka liasü, shibai pa taküm tepeyong shisaluyim tajung agütsütsü asoshi rangloker inyak aser Nagaland kübok tesem balala nungi kaketshir meyrejang aika taküm melenshitsüogo.

Kohima nung aliba Gorkha nungertemia pai Gorkha nung kaketshirtem shisaluyim nung teyari agütsüba aser ajungketba menungra bilemteter. Pai lapokba riju ajanga Gorkha

nungertem aika kaketshisatsü tajung bushitsü aser career tajung yanglutsü atema maongka agütsüogo, ta kasa sangdong ajanga metetdaktsü.

Pa asüba ya Livingstone Foundation International kibong atema dang masü saka educational fraternity ajunga aser Nagaland nung aliba nüburtem atema takoksa lir.

Executive Committee aser Kohima nung aliba Gorkha nungertem ajak tenüng nung ni asür kinunger, management, faculty, staff, kaketshir, alumni, aser Livingstone Foundation International kibong ajunga den asükhu lemsateper. Tulusang Tsüngremi mangyimer ajak nem anisüngzüker aser tashi agüjang ta aser asür tanüla teti tatem makadak anisüngzükdakjang ta sarasademtsür, ta tir Santu Thapa-i kasa sangdong ajanga lemsatep.



July 30, 2026 nü New Delhi nung BJP züngsemtemi Aam Aadmi Party office kima longkak aita Punjab nung paper leak asüba ken o dak sendakba nung Punjab Education Minister, Harjot Singh Bains menden nungi anenjang, ta takhangba agüja longkak aitba noksa nung angur.

E20ajanga'mileage'6%tashi ajemtsüa akok:Nitin Gadkari

New Delhi, Chiteni/July 30 (Agencies): Petrol nung ethanol shilem 20 meyoktepba (E20) ajanga gari nung 'mileage' shilem 2 nungi shilem 6 tashi ajema akümtsüa akok, aser ibaji gari category aser gari küm kwi amshir, iba dakji keta lir, ta Brihostibarnü Road Transport & Highways Minister Nitin Gadkari-i Parliament nung metetdaksü.

Paisa, jungjunga tendangba ajanga E20 atsükba agi gari engine nung timtem adokdaksüba kuli nguteta mali, ta metetdaksü.

Lok Sabha senden nung tezüluba nung telangzüba agütsüdang Gadkari-i, Automotive Research Association of India (ARAI), Society of Indian Automobile Manufacturers (SIAM) aser Indian Oil Corporation Ltd (IOCL) senteper bushisüngdangba ajanga, E20 totzü ajanga gari nung 'mileage' tera ajemtsüa akok, acceleration tajungba

kümdaktsür, gari nung senzüba quality tajungba aser E10 totzü den medemdangra carbon emissions shilem 30 agi tajemba adokdaksü ta bushitetogo, ta metetdaksü.

"Gari nung totzü atsükbaji shilem 2 nungi 6 tashi tajemba akümtsü akok, aser ibaji gari category aser gari amshiba küm dak keta lir. Dynamometer ajanga engine durability aser lenmang nung gari tendangba ajanga E20 totzü ajanga gari nung timtem adokdaksüba kuli kecha mangu," ta minister-i metetdaksü.

Paisa, iba study nung BS-III, BS-IV aser BS-VI garitem nung E20 atsükba tendanga liasü aser original equipment manufacturers (OEMs) den asüngdangtepa customised testing protocols benshia tendangogo, ta metetdaksü.

Petrol shilem 80 aser ethanol shilem 20 meyoktepba E20 petrol benokba sülen gari amshirtem aser opposition party temi E20 anema ola

adoker.

Gadkari-i, NITI Aayog, oil marketing companies, gari yangluba company tem, ARAI, SIAM, Indian Institute of Petroleum (IIP) aser technical institutions den jembitepa shilem lemsar Ethanol Blended Petrol (EBP) Programme ya benok, ta metetdaksü.

Paisa, India nung ethanol meyoktepba programme ya mezüng pilot project ka ama 2001 küm tenzük aser 2006 küm E5 benoka liasü, ta metetdaksü.

Paisa, E15+ petrol ya küm asem ser tesadang amshia liasü aser E19-E20 totzü ya tesüiba küm ana ser tesadang amshir, ta metetdaksü.

Two-wheeler crore 20 aser petrol gari crore 3 dak tali nung ethanol meyoktepba totzü amshia arur, ajisüaka gari nung timtem adokba mesüra raksaba kuli tejangja mali, ta minister-isa metetdaksü.

'One Nation, One Election' Bill asükwa mongpu senden nung benoktsü

New Delhi, July 30 (Agencies): 'One Nation, One Election' Bill ya tang tagidak tzüngluruwa mongpu senden nung mebenoktsü; iba bill asadangtsü atema Joint Parliamentary Committee (JPC) ka nem mapang agütsüsemogo, aser iba bill ya asükwa mongpu Parliament senden nung ang benoktsü.

Lok Sabha senden nung Committee chairman, PP Chaudhary-i bangzüng ka benoka iba bill dak sendakba report renemtsü atema mapang meshisema liasü; ajioda voice vote ajanga pai benokbaji agizüka liasü.

Lok Sabha aser state assemblies elections külemi dang agitsü atema Constitution (the 129th Amendment) Bill, 2024 ya asükwa mongpu Parliament nung ang benoktsü.

Asükwa mongpu Parliament ya taküm November ita tatembanglen tenzüktsü aser Khristmas anogo matongdang tembangtsü.

Iba bill atema Joint Parliamentary Committee-i linük tesem ajaklen temzüng tsütsü mongintem, lokti tentettem, shishashirtem, yimtenren lenirtem aser state sorkartem den jembishinüa arudar.

Tawa Chaudhary-i, 2029 küm Lok Sabha election nungi iba ya mapa küma benoktsü atema yimtenren party ajaki agizüktettsüsa committee-i lenla ajak nungi asadanga inyakdar, ta metetdakja liasü.

Sorkari ashiba agi, election khenyongi agitsü, senotsü aika kümzüktsü aser ketdangsubaren nung timtem madoktsü nükjidong nung iba bill ya benoker.

Parliament nung Vande Mataram Bill agizükogo

New Delhi, July 30 (Agencies): Brihostibarnü Lok Sabha nung Prevention of Insults to National Honour (Amendment) Bill, 2026 agizükogo; iba ozüng kübok mezüngmeshiba ya ozüng alema aibelen ka asütsü.

Prevention of Insults to National Honour (Amendment) Bill kübok Vande Mataram ken atenba nokdangba mesüra iba ken atendang timtem agütsübaji ozüng alema aibelen ka asütsü, aser aibelenertem küm asem tashi tepuokdak ayutsü akok, senchi achitsüa akok, mesüra temerenshi anaprong agütsütsüa akok.

Ano aiben aibelenertembo tajemba agi küm kabosa jail nung puoktsü.

Iba Bill nung o entepba mapang Minister of State for Home Nityananda Rai-i, Congress-i parnok yimsüsüba mapang nung linük ken nem akhümtsübu magütsü, ta ashi.

Paisa, Modi sorkari tim akhüm agütsütsü atema inyaker, ta metetdaksü.

DMK MP, Kanimozhi-i, iba ya linük meimba ama sayua benokba "Hindutva agenda" ka lir, ta ashi.

Laisa, Vande Mataram nung tekong trokprongla atentsü benokba yabo secularism aser federalism anema lir, ta ashi.

Iba Bill agizükba sülen senden nung rongrong adokba agi senden thinena liasü.

Brihostibarnüa sorkari tongtibang ozüng aika benoktsü merang, ajisüaka opposition-i NEET paper leak asüba aser police-i kaketshirtem dak tashiyim amshiba onük nung sorkar anema longkak aita liasü.

Opposition züngsemtemi

Parliament kilung nung dang masü saka kima nunga longkak aita, kaketshirtem dak tashiyim amshiba atema Union home minister Amit Shah-i telangzüba agütsütsüla, ta takhangba agütsü.

Rajya Sabha nung opposition lenir, Mallikarjun Kharge-ibo Amit Shah-i menden nungi anentsüla, ta takhangba agütsü.

Rajya Sabha nung Public Examinations (Prevention of Unfair Means) Amendment Bill, 2026 atema jembidang Congress Tir, Mallikarjun Kharge-i Amit Shah-i menden nungi anentsüla, ta takhangba agütsü.

Kharge-i, kaketshirtem dak ajok amshitsü, tear gas khaloktsütsü aser injang khaloktsütsü atema shibai temelaba agütsü?, ta asüngdang.

Congress aser INDIA teloktep nung densema aliba MP temisa Parliament kima, police-i kaketshirtem dak tashiyim amshiba aser Ayodhya nung Ram tekülem ki tenla auyaba anema longkak aita, Amit Shah-i Parliament nung tasüngdangbatem atema telangzüba agütsütsüla, ta takhangba agüja liasü.

Ano külen tanga osang ka nung, Brihostibarnü Ato kilonser Narendra Modi leniba nung minister tem senden mena West Asia tensa asadanga liasü. Iba senden nungji Home Minister Amit Shah, Defence Minister Rajnath Singh, External Affairs Minister S Jaishankar, Finance Minister Nirmala Sitharaman, Petroleum Minister Hardeep Singh Puri, Commerce Minister Piyush Goyal, National Security Adviser Ajit Doval aser tongti ketdangsertem aika aden.

भारत सरकार

कार्पोरेट कार्य मंत्रालय

त्वरित कॉर्पोरेट समापन प्रसंस्करण केंद्र (सी-पेस),

आई.आई.सी.ए. बिल्डिंग, 7वीं मंज़िल,

प्लॉट P-6, 7, 8, से-5, आई.एम.टी. मानेसर, गुडगाँव,

हरियाणा - 122050.

Email: roc.cpace@mca.gov.in

सत्यमेव जयते

Government of India

Ministry of Corporate Affairs

Centre for Processing Accelerated

Corporate Exit (C-PACE)

IICA Building, 7th Floor,

Plot P-6, 7, 8, Sector-5, IMT Manesar,

Gurgaon, Haryana - 122050.

Email: roc.cpace@mca.gov.in

FORM No. STK --6

PUBLIC NOTICE

[Pursuant to sub-section (2) and sub-section (4) of section 248 of the Companies Act, 2013 and rule 7 of the Companies (Removal of Names of Companies from the Register of Companies) Rules, 2016]

Public: ROC/C-PACE/STK-2/248(2)/2026-27/851

Date: 21/07/2026

S.NO

Work Item

CIN

Company Name

1

AC4264906

U72200NL2018PTC013458

TRANCETREE SOLUTIONS PRIVATE LIMITED

2. Company Act, 2013 nung section 248(2) kübok ajemdaker yangi tekalen agüja aliba Company-tem nungi parnok tenzükür külen küm ka tsüngda mapa metenzükutetba agi mesüra taoba küm ana tashi mapa kecha meinyaket süidaksüba agi mesüra Companies Act, 2013 nung section 455 kübok shia aliba ama mapa meinyaki anena aliba company ama ayutsü asoshi mapang tasazük tsüngda application (s) magütsüba agi mesüra mapa meinyaki anenba company (ies) akümba agi / company incorporate asüdang nangzükba ama subscription sen magütsüba agi aser section 10A/ nung sub-section (1) kübok shia aliba ama company incorporate ser anogo noklang ka ser tir tsüngda mesangdongtetba agi section 12 nung sub-section (9) kübok shia aliba ama tsüngdong oa reprangdangba sülen kecha mapa tenzüka maliba jangjangogo, aser parnoki parnok meyong register asüba company-ji anenadoknüba agi parnok tenüng company register nungi agentsü asoshi agütsüba application Registrar of Companies ket tongogo aser parnoki parnok tenüngji Companies register nungi agiendaktsünüa temepishiba agüja lir.

3. Anungji Registrar of Companies-i tekalen shia aliba company tem Register of Companies nungi agentsü atema benoker.

4. Register of companies nungi item companies tenüng agentsü atema benokba nungji nisung kari danga tashishiba lira pa mesüra lai tashishibaji iba sangdong agütsüba anogo nungi tenzüka anogo semer tsüngda tekalen shia aliba office address nem agüjang.

Irkan Tirkey

Deputy Registrar

CBC : 07123/11/0392/2627

Centre for Processing Accelerated Corporate Exit



TIR YIMYIM YIMOBILEM (EDITORIAL)

DIMAPUR FRIDAY, JULY (CHITENI) 31, 2026

Menoknok

Alima nung tzü-mopung dak sendakba lendong balala mapang shia ataloker; talisa tang amai tzüngluruwa mongpu nung anentsüh lendong, tzümetzüng lendong, tsüngi aser yipru lendong kanga bulua ataloker. Asenok tekong lima nung alirtemibo tzü metsüngbangba lendongbo majangshir saka anentsüh lendongbo kanga bulua ataloker. Item ama lendong nung nisung jenti asüamababo majurur, ajisüaka tsüngküm-mongpu kecha mebendangi atalokba menoknok lendong nungbo nisung jenti samar. Asen lima nunga menoknok lendong tulu atalokra nisung jenti samatsü ta tsübuu bilemer. Menoknok tsütsü mongintemi, mapang ka nungbo Northeast India nunga menoknok lendong tulu ataloktsü, ta asadangteta lir. Northeast India ya Seismic Zone V (highest risk category) nung lir, anogo-mapang masadangtetyonga northeast nung khenbosa menoknok lendong tulu ataloktsü, ta parnoki ashir. 1897 küm Shillong nung menoknok lendong tuluka atalokba mapang nungji nisung 1,500 dak tali sama. Northeast India nung akhidang Shillong nung atalokba amaji ano menoknok lendong tulu agi asen lima-a kongshira aika samatsü südi ta bilemer. Ibayongji mapang shia menoknok lendong atema renemshia mock exercise agir. Tang tesüsa Nagaland nunga taküm April 30 nü state tesem ajaklen District Disaster Management Authority (DDMA) Kohima-i tim departments den senteper Nagaland Emergency Preparedness Exercise (NEPEX) state-level mock exercise agiogo. Iba exercise ya odangbo agir masü ta asenoki angateter. Mapang-mapang shia alima tesem balala nung menoknok anakba osang kakettem nung azünger aser social media nunga angur. Taoba ita kija nunga ghonda 18 tsüngda Assam aser northeast nung menoknok trokben anoka liasü. Aji oda taküm küm tenzüker Nagaland nunga menoknok terarabo mapang shia anakba asenokia meteter. Ajisüaka, menoknok ya kong, kodang aser tasadangba Magnitude kwi nung anaktsüar ibajibo menoknok indang bushirtemia meshiteter. Tang tashi nung menoknok anakba mapang nisung teimtiba asübaji 1556 küm China nung menoknok khen anakdang nisung 8,30,000 (lakh ti ser meyrjang semer) asü. Meimchir tashitemetet ajanga menoknok dak sendakba aika bushitetogo saka menoknok anaktsüba mapang, anogo aser tesembo shitak meshiteter aser tenokdanga menokdangteter. Tashitemeteter lima nungbo tsüraburtemi lendong balala atalokdang koma-koda inyaksüar tanurtem nem rajemdaktsür alir, ajisüaka asenokbo aikati lendong balala atalokdang koma inyaksangshitsüar rajema mali! Mongintemi ashiba agi, menoknok tashi agi anakdang ki telung nung lira table ama tashi itta aliba osettsüset tukui ia atsüksüla; moapu nung lira kiojen tulu, light indong mesüra electric süngzü aliba anasa nungi pilatsüla; gari tanidak süra apu, süngdong aser light inzü nungi pilar moapu tesadem ka bushia anentsüla. Menoknok anakdang taoksa nung ajenertem kanga yirur aser azüklen nungi süng, long aser osettsüset tsükba agia yirur. Menoknok tashi agi anakba sülen ano ishiben anaktsü (aftershocks), anungji iba mapang nungji maoksatsü aser meyrutsüsa renema alitsüla. Kong, kodang aser koma ataloktsüar memetetba iba ama lendong atalokdang meyrutsüsa mesüra taküm kümzüksüsa rajema alitsüji kanga tongtibang asütsü.

OLEMSABANG

TSÜNGREMMUNG OTSÜ

(Iba article ya asür Wb. Kazükaba-i züluba "Sobaliba Penzü Kaket" tapu 5 - Aor Amungtsümung nungi agiteta adoktsür)

Asen Aori alu nung tsük, aonsotsü aser süngjanglijang kechisa inyakteta ali, item ajak asoshi Tsüngrem nem tenüngsang agüja ano temoatsü meshia amungba dang 'Tsüngremmung' ta ajar.

Tsüngremmung tenzüka

Alemlü Aor Chungliyimti alidang lokti taküm nung tongtibang mapaji alu yima züsenteta chia ajemtsüba liasü. Iba mapang nung Tsüngremmung o Merangsang na tembar liasü. Küm ka tena alu arr ayim, saka alurodang Tsüngremmung teimba aro. Anungji, Merangsang pa temba dang, "ana alu kasa dang ayim nung kodasür nabo tsük paikati aro?" ta asüngdang. Idangji Tsüngremmung pa dang ashi, "tsükma mapang na alui aodang to nibo tsüngrem mungsa amung, aji agi sü³aba", ta langzü. "Sürabangla sangkümbo ana külemi mungdi kü danga shiangma", ta Merangsang ashi. Anungji, taruba kümji mapang tonga arudang Tsüngremmung pa temba dang shir tena külemi Tsüngremmung amung. Iba kümji tenaprongla tsük ayi-yi aro. Idang nungjagi tenzüka Merangsang Tsüngremmung amung. Saka tatsüka dang lirbo Merangsang yim toktsür oatok nung Chungliyimti aliri iba amung ya mangazüktet.

Merangsangji adianutem den Chungliyimti nungi apusoa Jongpongshisakong ajanga oa Sangpu yimti nung ali. Pa yangji alidang, pai par yimer dang Tsüngremmung munga sayu, saka par yimer shingaia iba mung amungtsu mejangra. Merangsangbo pa kija Tsüngremmung amung nung, par alu nungji kanga tsüksüngsüng asü, saka par yimerbo shinga tsük junga maro. Küm ishika lir külen dang pai Tsüngremmung amungba ajanga tsük aika aror ta par yimeri apitet. Anungji, Merangsang amungba mung ya junger ta agizüka taruba küm nungibo yimer ajak iba mung amungtsü lemtet. Idang nungi par yimer ajaki Tsüngremmungji amung tenzüka. Yamaji yimer ajak külemi amung nung pakümjibo tsük aser tsünüsembong ajak kanga junga tsüksüngsüng asü.

Kenü anogo Merangsang tzüla ayongbanglen arr ateni aodang tsüngrem telok ka kanga longsoa arr atsütepya ajuru. Pai "nenok ya kechi asür ta asüngdang nung, onok tsüngremmung amunger" ta langzü. Anungji, iba jilu ajizüka Sangpu yimti aliri Tsüngremmung amungdang arr atsütepya ya tongtibang shilem ka ta benshia aru.

Mapang tatsüka lir Sangpurji Songjong-i oa ali aser yang nungjagi Longsa-i meyipa arua külemi ali, aser parnok nungi dang angazüka Longsa-i Tsüngremmung amung. Tsürabur mapang tongmelang, ochi aser telungjem asünung Longsa-i Tsüngremmungji kanga junga mungtet. Iba jagi yimti nung yimjiyimjung liasü. Khen mapang Longsa nung Tsüngremmung munga alidang Ao yim kar nungi ainer aru. Parnoki iba Tsüngremmung amungba ya junger ta ajiteta sangküm nungibo parnoka iba mung ya amungtsü ta shir ao. Taruba küm nungi "Longsa-i amungba mung to mungdi ni!" ta parnok jembiteper amungba agi tamasabo Tsüngremmung dang "Longsamung" ta jatsü. Oboula nung mapangbo Tsüngremmung ya anogo 6 (trok) nü tashi amung, saka Khrista yimsü arur külen tamangertemi amungtsümung kecha memungdaktsütsü ta noktangba ajanga tesülen British sakari anogo 3 (asem) nü dang amungtsü latettsü. Iba jagi Tsüngremmung dang karibo asemnü mung ta aja.

Tsüngremmung ya tamasabo Longsa mungder dang Aoli yimtsüng balala mungyonga ao. Yamaji Tsüngremmung ya mapang balala nung munga alidang, Dr. & Mrs. Clerk-i Ao limai tamangba yimsü den kaket shisatsü bener arua Impur nung school lapok, aser school nung Aor lanur anitena züngdaktsü. Saka kodang Tsüngremmung mapang arudir yimtsüng shia anogo balala nung sodi agütsütsüsa aküm, iba jagi school nung timtem kanga ajuru. Iba timtemji ajiteta 1944 küm Ao Kaketshir Mungdang (AKM) Longjang nung alidang Tsüngremmung ya Aor ajak lirumedema amungtsü asoshi sarkar dangi temelaba meshitsü lemtet. Yamaji 1946 küm Mokochung nung P. Adam SDO aliba mapang Tsüngremmung ya August 1-3 tashi Aor ajak külemi amungtsü temelaba agütsü.

Tsüngremmung mongpu


Tsürabur mapangbo, tsükma mapang atongdang kodang alu nung aih apongma-a repra mapa temdir aser Longsa lushi nung süngsapan pongdir, idangji Tsüngremmung amungtsü mapang atonger ta meteta, mapang aser anogo tajung shiteta Tsüngremmung munga aru. Saka 1946 küm sarkari latettsür külen nungibo küm shia August 1-3 tashi anogo yamai lemsar amunger.

1. Süngben Mung
2. Zünga Yongya
3. Yati Mung

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khrista osangtajung mangashidangba nütsüing 28% lir: Jason Mandryk



July 30, 2026: Tang Arogoi inyakba apibo Kibubai tenyaba wadang merenemtsü, ta Operation Word nung yimobilem zülur, Jason Mandryk-i metetdaksü.

July 28 anepdang Manila nung Arise Asia 2026 Congress nung lanur 4,000 den jembidang Mandryk Jason-i, Kibubai tenyaba wadang merenemi aliba indang report metetdaksü.

World Christian Database, Operation World aser Joshua Project indang osangtem nung ajemdaker pai, Arogotemi missionary temi inyakba asadangsü nüngdak, ta ashi.

Mandryk-i, tang alima nung nütsüing billion 2 dak temaibo (nütsüing shilem 28) Khrista osangtajung mangashidang; parnoki Yisu tenüing-a kodanga mangashidang, ta ashi.

"Tang alima nung tanur teimtiba asoba tesemtem ya Khrista osangtajung agi junga mayimjemba region tem lir. Osangtajung mangashidangba nütsüing teimba dang akümer, kechiyong alima nung osangtajung mangashitsüsa aliba tesemtem nung anogo shia tanur 34,000 dak tali asor," ta Mandryk-i metetdaksü.

"Asenoki mission ya lenmang tasen ka ajanga inyaksü nüngdak, aser Kibubai tenyaba wadang tulutiba inyaksü atema Arogo ajak ajungshitsü nüngdak," ta pai ashi.

Mandryk-i, "50 AD nung alima nung nütsüing shilem 99.9-i Khrista osangtajung mangashidangi liasü. Iba mapang nungji Arogo putu ka dang tain liasü. 1960 küm tashi nungbo Khrista osangtajung mangashidangba nütsüing shilem 50 liasü aser 2025 küm tashi nungbo Khrista osangtajung mangashidangba nütsüing shilem 28 lir. Terenlok alibaji atangji, ajisüaka Khrista osangtajung mangashidangba nisungtembo teimba dang akümer. Tasen Lai mapang nung Khrista osangtajung mangashidangba nütsüing million 250 liasü, 1960 küm nütsüing billion 1.5 liasü aser tanübo nütsüing billion 2 dak tema lir," ta metetdaksü.

Paisa, "Alima nung Khristan

masüba nütsüingtem rongnung shilem 81-ibo Yisu sülen anidaker nisung kata memetet. Tetezü Khristan medemer kata mali, mapa külemi inyaker Khristan kata memetet mesüra kibong nung Khristan züingsem kata mali. Nisung teimbakati Yisu agizükbaji parnoki Yisu sülen anidaker kabosa meteta aliba agi lir. Ajisüaka Khristan masürtem teimbakati Khristan kata meteta mali," ta metetdaksü.

Mandryk-i, alima nung Khrista osangtajung mangashidangba region metetdakja, America nung nisung million 12-i osangtajung mangashidang, Europe nung million 30, Pacific nung million 1.4, Africa nung million 300 aser Asia nungbo nütsüing billion 1.8-i Khrista osangtajung mangashidang, ta metetdaksü.

"Linüktem sasep linük ka nung Khrista osangtajung mangashidangba nütsüing million 600 lir aser ano linük ka nung million 500 lir. Iba takdang nung mena alirtem teimbaka item region (osangtajung mangashidangba) nungi lir. Linük ana kija nungji Yisu indang angashitsü atar nisung billion 1 dak tali lir," ta Mandryk-i metetdaksü.

Pai Asia map tuyua, "Ibayongji Arise Asia ya tanü alima nung asalentong yangluba tongtibangtiba sendentem rongnung densema lir, kechiyong asenoki Khrista osangtajung mangashidangba tesemtemi yoktsü atema lanurtem ajungmesor," ta ashi.

Ano alima tesem balala nung pei nütsüing ajak ayimjemtsüsa Arogo kangabo mainba linük aika lir, aser item linüktem nungji tangar teyari nüngdaker; item linüktem rongnung India, China, Pakistan, Bangladesh, Indonesia aser Iran linüktem densema lir.

Laishir Tertullian-i akhidang Khristantem dak sendakba nung jembiba o ka lepszia Mandryk-i, Khristantem tsüingda kati ka züingshiba ngua mamangertem pua-a liasü, ta ashi.

"Khristantem tsüingda kati ka meimba aser kati ka atema taküm-a bendanga agütsütsü melunga liasü," ta pai

metetdaksü.

Julian the Apostate mapang nung wara ka kanga sashia prokba mapang nung mamangertem jenshia liasü, ajisüaka Khristantemibo shirangertemji anepalua liasü; iba mapang nungji Khristantemi tsüraburtemi toktsür ajenba tanurtem-a anepalua reprang, ta pai ashi.

Mandryk-i, "Item Aso (century) nung Arogo kanga ina liasü, kechiyong tamangertemi tasü itta Khrista kuli asü, kechiyong parnok rongnung temeimtep liasü, aser pei taküm bendanga agüja Yisu Khrista temeim sayu," ta ashi.

Mandryk-isa, Khristantemi ter shilem aser tenla balala agütsür, ajisüaka item tenla nungjagi shilem tilakati dang missionary tem atonger, ta ashi.

Paisa, America nungertemi mission atema tenla agütsüba dang nungibo 'Halloween' süoshitem nung sen teimba indoker, ta ashi.

Mandryk-i, "Khrista osangtajung agi mayimjemba tesemtem nung tang missionary 15,000 shi lir. Missionary tasenpurtem shiai pei tenzükba mapang nung nisung 50,000 dang-a ayimjemra, mayimjemba nisung ajak ayimjemtsü atema Arogoi ano missionary 75,000 tali nüngdaksü. Ibaji tang aliba missionary tem (15,000) den medemdangra ponguben agi teimba lir," ta metetdaksü.

Mandryk-i, tang alima nung nütsüing shilem 74-bo internet den sendaktepa lir, anungji social media, apologetics channels aser online Scripture tools ajanga osangtajung lemsateptsü koka lir, ta metetdaksü.

Mandryk-i, "Khrista osangtajung agi mayimjemba tesemtem nung anogo shia tanur 34,000 asor, ta asübaji ajanga asenok temelung ajema malitsüla. Tanü tashi alima nung osangtajung agi mayimjemba telok meyrjang aika lir, ta ashiba ajanga asenok melung majemtsüla. Kechiba süra, alu arur Kibubaji Pa lir aser Pai inyaksü. Tsüingremer otsü nungji shilem agitsüsa asenoki iba maongka agia Pa dang hai, ta ashitsüla," ta ayongzük.

ANOGO ABEN TSÜNGREM DEN

Sarasademang, ataang mesüra mapa ~ T. Ken 94:11-23

"Tamajung inyakeretm anema ni asoshi shibai noktaksü? Temenen inyaker anema ni asoshi shibai noktaksü?" (t.16). Iba tasüngdangba nung kechi koma telangzüba ka agütsütsü ni memetet.

Tebilemstütem asoshi asenoki sarasadem dang asütsü mapang ka lir. Asenoki ataa alitsüba mapang ka lir. Tsüngremi "tangbo masü- ni tesülen ibai reprangtsü" ta ashitsüba mapang ka lir. Saka asenoki inyaksüba mapang ka lir. Mosa noktaka atar nüburtem Ejip nungi adokdaksüba, mesüra Dawidi Tsüngrem O bendangba mapa inyakdang ama.

Asenok alima tesangwa ama noktaker sangwadaksütsüba mapang ka lir, asenok alima metsü ama alima raksaa aodang aji kümzüktsü amshitsü mapang ka lir.

Terepranger ka ama, "Junger, ni iba atema sarasademtsü" ta ashitsü koda temüla! Junger, yamaji inyakang. Saka Tsüngremi ashir, "Ni atema tamajung inyaker anema shiba noktaksü?" Telangzüba: Shirnoki Tsüngrem parnok Teyarir ta meteta lir parnoki noktaksü. "Kibubai ni meyarilasang Kü nela sür lila" (t.17). "Saka Kibuba kü mitsa aser kü Tsüngrem, kü lung, shiba dak ni jenoker" (t.22). Kodang Tsüngrem ne teyarir lidir, kodang Tsüngrem O nung aruba Tsüngrem tashi na katir, nai iba lima temenen anema noktaktettsü.

Shirnok temenen nungi pilaa lir mapa inyaksü ajar. "Temenen chuba menden, kobai temenen ozüing kümdaksür, ibaji ne den telungjem lidima?" (t.20). Tanü asenok temenen aika nungi kümzüktsü ozüing kar.

Aji saka shirnok temenen nungi pilaa lir, parnoki tamajungba anema Tsüngrem den noktaksüla- Pai tatem nung takok agütsütsü ta amangertem. Asenoki rara karbo makoktsüsa akok, saka Tsüngrem tenüing sangang asenoki raraji akoktsü!

Tamajung inyakeretm den Khristantemi pelaa malitsüla. Asenoki parnok den sarasadema, ataa aser mapa agi inyaksüla. Tsüngremi na Pa asoshi tawabangba ka südaktsüner. Pai na kong yutsür idakji taküm aliba kuli ka süa liang. Kodang nai sarasademer, ataa alir mesüra shilem agir, Pa leniba asüngdangang.

Kaduna State kübok Khristan yim ka nung 30 tepset

July 30, 2026: Nigeria nung rongdoktsüogo.

Kaduna state kübok Khristan Hajara-i security agencies yimtsüing ka amakdang nisung dang aibelenertemji jangjatsü, 30 tepsetba sülen Khristan aputsü aser parnok anema ken lenir kati ketdangsertem dang o akatsüla ta mepishiba den security agüjang, ta külemi linük Tir Bola Tinubu mepishiogo. aser Kaduna State Governor Uba Sani na dang yimtsüingtem nung security sepai tali lemozükjang, ta mepishi.

Kauru Local Government Legislative Council nung Stephen Hajara-i, mapang shia Naridon nung alirtem amaker, ta shia lai sorkar dang Khristantem kümzüktsü atema tliba inyaksüla, ta takhangba agütsü.

Laisa, "Yamai maneni tepsetra Khristan nütsüing ishiba-ishiba dang akümstsü, aser mapang ka nungbo kiralongrartemi iba area nungi Khristantem meshimeshia samatsütsü," ta ashi.

International Christian Concern (ICC) den jembidang Laisa Nigeria Ojangji ojang. Yimlibilema ketdangsertem dang US den security partnership onok niisung 11 tasü mang aremer. Taoba ita yanglushitsü mepishiba den aser tang tasü mang 30 remogo. külemi alima tesem balala nung Khristantem danga parnok onok yariang," ta metetdaksü. nungita yaritsü mepishi.

Amongnü aonung Hajara-i, "Onoki prangpong amer telok ka tekümzükba nüngdaker, teyari Naridon yimdaki aruba sülen balala nüngdaker aser kintem Hombarnep tashi parnoki teyari nüngdaker. Kauru amakdang tanur 8 densema nungertemi ita shia nisung 30 khaset, nisung aika kinüngertem tasü mang yiru aser ki aika meremner," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Zükolak**

(n) Zü talak, zü tokolak (head of young bamboo shoot)

* Etsük nung zükolak rema ayur.

Zükset

(n) süng agi züka südaktsü (beaten to death)

* Teloki auer ka zükset.

OLONG PAITEP # 7583

1						2				3
								4		
5		6				7				
8										9
								10		
				11		12				
		13								
14						15				
				16						

TIPLIN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzü asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7582 TELANGZÜBA**TIPLIN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

Sivasagar administration-i school tem ano anogo 10 shibangtsü mepeshi**Guwahati, Chiteni/July 30**

(Agencies): Sivasagar district administration-i, tzümetsüng agi kanga mejungi kongshir aliba school tem atema summer vacation ano anogo 10 atsülangtsütsü mepeshia metetdaksüogo. Kaketshirtem ajangzükdaksütsü aser parnok kümzüka toktsütsü nükjidong nung iba temepishiba agütsüogo.

District nung school 500 shi tzümetsüng agi kongshir lir aser iba ajanga kaketshir 70,000 dak tema akoksadar. Sivasagar Inspector of Schools Samiran Bora-i, tzümetsüng agi kongshir aliba school tem summer break August 10 nü tashi atsülangtsütsü mepeshia Directorate of Secondary Education and the Directorate of Elementary Education dangi shiti ka züluogo.

Tzümetsüng ajanga teraksatsüba balala bener arutsüba yanglushitsü atema agütsütsü aser kaketshirtem tekümsükba kübok angazükdaksütsü nükjidong nung anogo atsülangtsütsü asoshi mepeshia asüngdangogo.

Administration-i ashiba agi, tzümetsüng agi mekongshi-i aliba school tem atakzükja aliba ama August 1 nü nungi school lapoktsü.

Iba temepishiba ya agizükra tzümetsüng agi kongshir aliba school tem ano anogo 10 talila shibanga atatsü, aser iba ajanga kaketshirtem, tsürapur aser school ketdangsürtem nem anisüngzük agütsütsü kechiyong Sivasagar district ya tzümetsüng agi maneni timtemdar.

Assam: Sivasagar nung ano tasümang ana ngutetogo**Guwahati, Chiteni/July 30**

(Agencies): Assam nung Sivasagar district kübok tzümetsüng agi kanga mejungi kongshir aliba Nepalikhuti yimtsüng nung samar alirtem bushiba mapang ano tasümang ana ngutetogo. Tzü asemshia aoba mapang tasümang ana ya jana nung remer lia ngutetogo.

Yimdaklirtemi pei ki aser temeket merketetba mapang tasümang ana ya nguteta liasü.

Yimtsüng nung tzümetsüng agi teraksatsüba tulu bener arutsüogo, kong refrigerator aser tanga ki oset balala apongshir aliba nguogo, aser yimdaklirtemi samar alirtem

maneni bushidar.

Yimdaklirtemi mezüngbuba tasümang ya ayongküm anasa angu. Tasümang ya lishi nung remer tetzüng dang temai adoker lia nguteta liasü.

Yimtsüng nung alirtemi ashiba agi, tasümang anprongla ya tzümetsüng agi bener arutsüba jana nung remer liasü.

"Onok ajak tanü yimdaki meyipa aru. Onok ki merketetba mapang tasümang ana nguteta liasü. Iba sülen onoki Gaonburha aser police administration nem osang agütsü," ta yimdaklir kati ashi.

Tasümang ngutetba indang

osang police aser civil administration nem agütsüogo, aser ketdangsürtemi post-mortem examinations agiba sülen maitsü jangjatsü.

Tzümetsüng kanga sashia aruba sülen Nepalikhuti yimtsüng nung alirtem pei ki toktsür jenshia ao. Upper Assam nung tzümetsüng agi kanga mejungi kongshiba yimtsüng rongnung Nepalikhuti ya-a ka liasü.

Tzü asemshia aoba mapang yimdaklirtem pei kidangi meyipa arudar. Yimtsüng nung alirtemi ano tasümang aika jana aser lishi nung remer alitsü ta tsübua bilemer.

Manipur sorkari Thanlon sub-division Churachandpur-i belentsü tuyu**Imphal, Chiteni/July 30**

(Agencies): Manipur sorkari department ajak aser district ketdangsür tejentem dang Thanlon Sub-Division ya Pherzawl district nungi Churachandpur district-i anogo tenet tsünga belener aotsü tetuyuba agütsüogo.

July 29 tetuyuba agütsüba nung Secretary (Land Resources) Th. Kirankumar-i, ketdangsürtem dang administrative transfer benoka inyaktü aser hopta ka tsünga mapa benoka inyakba osang agütsütsü metetdaksü.

Iba jenjang agiba ajanga Thanlon yimsüsüba dak sendakba nung mangatetep aliba asüngsashidaksüogo. Iba telemtetba agiba ya Zomi nung lokti tentetemi pelashishia agizükogo, saka

Pherzawl nung lokti aikati anema arudar.

Thanlon ya 2016 küm December ita sorkari Pherzawl district agizükba sülen iba district küboki ait. Ajisüaka Manipur sorkari 2022 küm iba subdivision ya Churachandpur-i meyipa abener arutsü benokba sülen mepetmesü adoka aruogo.

Zomi nung lokti tentetemi Thanlon koba Zomi nung timba aliba Assembly constituency ka lir, iba ya Churachandpur district nung shilem ka asütsüla ta shia aruogo. Parnoki ashiba agi, Hmar nung timba aliba Pherzawl nung parnok aniokba ajanga lokti ketdangsüba aser yimsüsüba dak kongshiogo.

Taküm küm tetenzüklen Zomi Village Chiefs' Association-i, Pherzawl district

administration sülen tashi anga manidaksü telemtetba agi, aser 2022 küm sorkari Thanlon ya Churachandpur-i meyipa bener aotsü tetuyuba agütsür aliba benoktsü takhangba agüja liasü.

Ajisüaka iba inyakyim ya Pherzawl nung alirtem aikati anemogo. 2021 küm sorkari sensaksem metenzük tsünga Pherzawl District Development Committee kübok yimtsüng 22-i tashishiba ka agüja liasü.

Item teloktem yagi ashiba agi, Thanlon ya Pherzawl kübok toktsüba ajanga ketdangsüba tezübaba kümdaksütsü aser loktiliba aser sobaliba tesendaktep maneni wazüka ayutsü.. Parnokisa, tang Thanlon Sub-Division belener aotsü inyaktepba ya yimden yimsüsüba tsütsü tajangzüng angutsü atema lir, ta ashi.

**GOVERNMENT OF NAGALAND
STATE COUNCIL OF EDUCATIONAL RESEARCH AND TRAINING
NAGALAND : KOHIMA**

No.SCERT/TET/Gen.CORRES-3/2025/**Dated/Kohima the 29th July2026****NOTIFICATION**

The State Council of Educational Research and Training (SCERT) will conduct the 6th edition of Nagaland Teacher Eligibility Test (N-TET) on 21-11-2026 (Saturday). The detailed information containing details of examination, syllabus, eligibility criteria, examination fees and important dates will be available on N-TET official website and pre-service and in-service teachers are requested to download the information Bulletin from the below-mentioned website only and read the same carefully before applying. The candidates must apply online only through SCERT website <https://scert.nagaland.gov.in>. The online application process will start from 01/08/2026. The last date for submitting online application is 31/08/2026.

No applications will be entertained after the last date.

KERÜPFEÜ RÜPREO**Director****SCERT, Nagaland, Kohima.**

Pakistan northwest tsütsü telungpuri police 10 tepset



Dera Ismail Khan, Chiteni/ July 30 (Agencies): Pakistan northwest tsütsü police post ka nung Islamist telungpuri drone amshia aser mita atar amakba nung police 10 shi tepset, ta police temi ashir, koba hopta ka tsüngta tanaben amaker alitsü.

Iba lendong ya Afghan arütsü anasa Hangu district nung mapang talangka telungpur teloktem aliba tesem nung Bodhbarnü menur atalok.

Pakistan aser Afghanistan tsüngta raraba ajanga nisung meyirijang aika tepsetba sülen Pakistan arütsülen telungpur tebilemtsü ya ita ishika tali kumogo, aser mitkar aser

police dak timba tenük yoker azüdokshir.

Islamabad-i ashiba agi, telungpur temi Pakistan nung amaktsü atema Afghanistan nung tesem balala amshia training agir aser sentong yanglur. Ajisiüaka Afghanistan nung Taliban sorkari iba tai tongloksüba magizüker aser telungpur tebilemtsü ya Pakistan linük telungzük indang tebilemtsü lir ta ashir.

Telungpur temi tapoktsü oset inoka aliba quadcopters agi police check post nung amakba sülen atsüka atar amak tenzük, ta police temi sangdong ka nung ashi.

Iba sülen ghonda ishika

khatepba mapang police ter aser lendong agütsür 15 asü, ta provincial police chief Zulfikar Hameed-i ashi.

Islamist telungpur temi arütsülen security forces dak amaktsü atema quadcopters amshia arur.

Tang tesüsa amakba atema telok katia tenüng agia mali, koba anasa Tank district nung takum bendanga agütsür bomb pokloksüba nung Pakistani army 12 densema nisung 15 tepseter anogo ishika lir ataloker. Iba lendong atalokba atema Tehreek-e-Taliban Pakistan mesüra Pakistan Taliban-i tenüng agia lir.

Iba telok yagi sorkar atsüngdoka pari yangluba Islamic ozüng tesashiba amshitsü meranga 2007 küm nungi Pakistan sorkar den rara arur.

Afghanistan den arütsü anasa Pakistan nung telungpur temi amakba tali kumogo aser kidanger linük ana tsüngta asendenshir raratsüsa jenjang ka nung lir. Küm aika sülen tembar asüba nungi tsükchir kumer aliba linük ana tsüngta February ita tesashiba rara Pakistan-i Afghanistan linük telung nung tayimtsü amshia maka liasü.

Iran indang IRGC targets ter dak tema amak: US

Cairo, Chiteni/July 30 (Agencies): Tehran-i Middle East nung US sepaitem dak ballistic missiles khaloktsüba sülen US mitkari ghonda ana operation tezükba nung military command centres aser drone facilitied densema Iran nung Islamic Revolutionary Guard targets ter dak tema amak, ta US mitkari ashir.

Operation ya Brehostibar aonung 0000 GMT (India nung anepdang 5:30 ako meta) tenzük aser 0200 GMT nung tembang, ta U.S. Central Command (CENTCOM)-i ashi.

"American sepaitem, shishilempaba rong aser kidanger Gulf linüktem nung Iran aser par proxies ajanga timtem agütsüba tali samatsütsü nükjidong nung amak," ta CENTCOM ajanga sangdong ka nung ashi.

US-i Qeshm Island nung amakba mapang nisung asem asü, ta Iran indang state media ajanga ashi.

Brehostobarnü Jordan armed forces-i ashiba agi, Iran-i parnok dak amaktsü merangba nokdangteta missiles pongu anünglak nung lia khazüka yok.

Iran-i Jordan nung US sepai alidak ballistic missiles khaloktsüogo ta Bodhbarnü ashiba sülen US sepaitem yagi

amakba alitsü. CENTCOM-i missiles ajak khazüka yok ta ashi. Jordan nung aliba US bases nunga tang Iran-i tenük yoker amaktsü meranger.

Bodhbarnü US aser Saudi sepaitemi Iraq anüdoklen Iran den sendaktepa aliba teloktem dak amak, koba Iraq nungi Saudi toztü nung tenük yoker drone amshia amakba atema telangzüba agütsüba alitsü. Linük ana külemi amakba ya tang mezüngbuba Riyadh-i yimjak nung Washington den külemi amakba alitsü.

Egypt nunga drone kati Mediterranean tzükum nung Damietta rongnendak US meyong gas storage tanker ka nung amak, ta British maritime security firm Ambrey-i ashi.

Egypt indang Petroleum Ministry ajanga sangdong ka nung rongnendak mi adoka aliba jangjatsüogo saka drone amshia amakba mashi. Aser tang tashi iba lendong ya shir mapa'ar mejangjai lir.

Tang tesüsa Iraq aser Egypt nung amakba ajanga iba rara nung Middle East linük timba atsüoktsü tenda ka nung lir, kechiaser taoba hopta Yemen nung Iran den sendaktepa aliba Houthi teloki Saudi Arabia indang rong tem nokdangtsü sangdongogo.

US aser Israel nati February ita Iran dak bomb

poklokja rara ya tenzük, koba hopta ishika ang raratsü ta Trump-i shia liasü. Khen atema ceasefire agreement ka yanglua aliba June ita raksaa Strait of Hormuz nung asendenshir rara tenzük, koba Iran-i par kübok lir ta ashir.

US sepaitem dak missiles khaloktsüba atema Iran dak kanga sashia amaktsü saka Washington-i ano iba rara tembangtsü asoshi yimjung lenmang bushir, ta Trump-i ashi, koba ajanga Strait of Hormuz alenbanger alima nung toztü aser rongsenketzüng kanga mejungi anokshitsür.

Iran nung rara metenzükdang iba tzi lenmang ajanga alima nung amshiba toztü aser liquefied natural gas shilem 20 shi bena liasü, koba Oman aser Iran tsüngta lir aser Gulf north aser Gulf of Oman aser Arabian Sea sendakteper.

Yimjung ken o jembiba nung tetsüksatsü tulutubaji iba strait ya kumogo aser yangji maneni khatepa tensa tamajungba kumdaktsür.

Iran-i, strait nung temelaba maliba lenmang ka ajanga aotsü merangba tankers asem nung parnok amak aser strait ya par kübok lir, ta Bodhbarnü ashi.

Gulf linüktemi bhukuma Oman-i Iran nem Strait of Hormuz ketdangtsütsü asoshi

MULUNG NEN O

Tasoba 24.03.1932 - Tasüba 22.07.2026

Ozü tsürabur Obala **Imrongshilu** (Akhoya) akümüli tembangba anogo nungi maneni Arogotem, lokti tentet balala, kidong, tembar adianutem shirnokisa nebu, rongsen aser sarasadem agi onok nungita yariogo nenok ajak dang kanga pelaba metetdaksür.

Temoatsüba Tsüngremi nenok temeim mapa tajung yari maneni moajangma.

Temeim chirnurtem, semchirtem, anükapang aser kinungertem.

Russia-i anünglen nungi Ukraine amak, nisung 8 tepset

Kyiv, Chiteni/July 30 (Agencies): Russia-i Brehostibarnep missiles aser drones amshia Ukraine amakba nung nisung ti tepset, ta Ukraine Tir Volodymyr Zelenskyy-i ashi aser air defence agi anüngba indanga pa lemsatepa tembar linüktem dang teyari meshia liasü.

Zelenskyy-i Telegram app nung sangdong ka nung, Russia-i missiles 70 dak tema aser drones 280 shi khaloktsü, ta ashi. Linük yimtiba, Kyiv aser Poland den arütsülen Lviv

region nung tali rangloker amak, ta Ukrainian air force ajanga ashi.

Poland ya European Union aser NATO züngsem lir, aser Russia-i amakba mapang par airspace kumzüka ayutsü asoshi fighter jets tem yoka liasü. Ukraine indang foreign minister-i ashiba agi, Russian cruise missile ka Poland ajanga ao, aser aji apokba sülen ketdangsür temi ali pokteta adoka aliba aser missile teraksa angu.

"Tang tashinung linük tesem balala nung nisung ti tepsetba osang lir," ta Zelenskyy-i ki raksar aliba, mi jangrua aliba aser ketdangsür temi ki teraksa mürekba noksatem lemsatepba nung ashi. "Nisung ter dak tema yiru aser parnok ajak nüngdakba medical teyari agitar."

Air defence missiles magütsüra mesüra agütsüba nung mapang agira, Ukrainian air defence unites temi nisung takum kumzüksü asoshi alakteta mongintem nüngdaktsü, ta Zelenskyy-i ashi.

Air defence units temi missiles 55 aser drones 265 khazüka yoktet saka ballistic missiles toku kisüng raksatsütet, aser missiles 11 aser drones 17-i tesem 20 nung kongshi, ta Ukraine air force ajanga ashi.

Russia indang ballistic missiles khazüka yoktettsüba nok-nü Ukraine ket nung alibaji US-i yangluba Patriot air defence system ya lir, koba ola dang aiben agi tekeraba nung jajar, saka alima nung iba ya kanga ajema lir.

Dnipropetrovsk region nung tanur asem densema nisung trok tepset, aser yangji yimtsüng ka nung Hokulbarnü mangyimtsü ketdangsür temi sangdongogo.

Kyiv nung nisung ka tepset aser Poltava nunga nunga ka asü. Kyiv nung air alerts ya Bodhbar aonung ghonda pongu dak tema liasü aser nisung meyirijang aika metro stations nung jenoka liasü.

FIFA-i Argentina anema jenjang agi tenzükogo



Chiteni/July 30, 2026 (Agencies): World Cup final nung Spain makokba sülen tatalokba aser asayamung tepeyong yimayimpong tamajung benshiba atema FIFA-i Argentina anema jenjang agi tenzükogo.

Taoba hopta FIFA-i, New York New Jersey Stadium nung final asaya tembangba sülen tatalokba asadangtsü atema disciplinary and ethics prosecutor ka shimogo. Final sülen Argentina nung asayar aser staff tem aika Spain nung asayartem den mangatettep adoka liasü.

Prosecutor tetuyuba dak ajemdaker Fifa-i, teka sangshiba atema Fifa indang disciplinary code article 14

kübok Argentina nung asayar Nahuel Molina (two counts) aser Leandro Paredes (three counts), aser Argentina assistant coach Roberto Ayala (one count) nung bushisüngdangtsü.

Molina ya ano article 14 kübok asayar kati benshitsüba yimya mebenshiba atema merenshitsü akok.

Team-mate Thiago Almada aser Spain nung midfielder Gavi nata kasa aibelen atema aitsüogo.

Fifa indang disciplinary code kübok, asayar kati benshitsüba yimya shitak mebenshiba atema asayar aser ketdangsürtem asaya ka atema tenokdangba agütsütsü shia lir.

Kasa mapang nung Argentinian Football Association-a, asaya balala nung aibelenba atema tang o bendangdar, kong asaya mapang asaya dak sendaka maliba inyakyim benoka inyakba (article 13), team inyakyim meshidakba (article 14), tangar mezügmeshiba & racist abuse (article 15), aser asaya mapang security anema inyaksangshiba (article 17) nung densema lir.

Semifinal nung England akokba sülen Argentina nung asayartem Falkland asetkong ya parnok meyong ta shia banner ka bener benjungtepba liasü. Banner nung "The Falklands are Argentine" ta zülür liasü.

Ajinkya Rahane international cricket asaya nungi anisüngzüker



Chiteni/July 30, 2026 (Agencies): India nung nüngtugu cricket asayar Ajinkya Rahane, küm ter dak tema asayaba sülen Brehostibarnü international cricket asaya nungi anisüngzükerogo. Pa ya bendangalen oa kanga junga asayaba asayar ka aser ajaki akümtsüsuba lenir ka liasü.

Pa Test 85, ODI 90 aser T20I 20 nung asayaba sülen asaya nungi anisüngzükerogo. Pai international run 8,414 yanglur lir, kong century 15 aser half-century 51 densema lir.

"Ajak tetenzükdak lir aser tatembanga lir. Mapang tonga aruba mapang agizükteta tejakdangi aotsü nüngdaker. Ni batting amenba mapang timing dak metaloker aru aser timing ya kodang tongtiban aji angateta liasü," ta Rahane-i pa indang retirement video nung

ashi. Rahane indang career nung ajak dang tongtibangtiba asayaji Australia nung 2020-21 Test asayamung ya asütsü.

Adelaide nung India team run 36 dang yanglur asayar ajak out süatokba den Virat Kohli kidangi meyipa aoba sülen asayamung akoktsüsuba toktsür India team-i tetoktepa metokteptetsü ta bilema liasü.

Ajisüaka captain ama Rahane-i anir India team-i iba asayamung ya 2-1 agi akok, koba India cricket asaya puti otsü nung takok tajungtiba ka liasü.

Rahane lenisüba nung India team Test asaya ka nung danga tamakok ngua mali. Pa lenisüba nung India team asaya 6 asaya. Parnoki asaya 4 akok aser 2 draw süa liasü.

Rahane ya bendanglen oa kanga junga asayaba atema

kanga nüngtugu lir. Pa ya India nung batter tem rongnungi Test aser ODI naprongla nung mezüngbuba century SENA linüktem nung yangluba mezüngbuba asayar lir.

Pai Test asaya nung century 12 yangluba ya pressure nung asayaba mapang yanglutetogo aser Rahane-i century yangluba mapang India team khen danga tamakok ngua mali. Maneni pa ya World Test Championship nung century yangluba India nung mezüngbuba asayar lir.

Maneni South Africa den asayaba mapang pai innings anaprongla nung century yanglua pa ya India nung batter tem rongnungi No. 5 mesüra iba dang tekübokba nung batting amenba batter tem rongnung innings anaprongla nung century yangluba mezüngbuba asayar aküm.

Rahane ya fielder-a tajung ka liasü aser pai Test asaya ka nung catch ti tashi süa lir.

"Ni India tenüng nungi asayatsü nükjidong liasü. Ni kü linük aser team kü jakdang toktsü. Ni India nung cricket asayar ka ama kü mapang tembangogo, saka asaya nung maneni shilem agitsü. Ni lanur asayartem nem teyari agütsütsü yongya atar," ta pai ashi.

Fleming England Test team coach kümogo

Chiteni/July 30, 2026 (Agencies): Taoba mapang New Zealand captain Stephen Fleming England Test team coach asütsü shimogo aser Joe Root-a tanaben captain kümdaktsüogo.

Asaya ishika junga masayatetba den ground tema nung tatalokba kar ajangshiba sülen taoba Test coach Brendon McCullum mapang nungi anentsüogo, saka pa maneni ODI aser T20 coach asütsü.

Arishi küm 35 tain Root shiba 2017 nungi 2022 tashi Test captain liasü, pa lenisüba nung England team-i asaya 65 nungi 27 koka liasü.

Ben Stokes June ita international cricket asaya nungi anisüngzükerba sülen Root tanaben shimshio.

Test team coach mapa agizüktsü atema yongyaseta atar ta Fleming-i ashi.

"Alima nung cricket asaya nung iba mapa ya ajak dang tulutiba ka lir aser ni shimba atema kanga pelar," ta pai shisem.

Fleming leisüba nung England team Pakistan den Test asayamung masayatsü,

koba August 19 nü tenzüktsü. Iba asayamung atema assistant coach Marcus Trescothick interim head coach asütsü.

Fleming ya New Zealand den par kibong den mapang tatsüka entokba sülen lemluwa tatemlen UK-i aotsü aser December ita South Africa den Test asayamung atema renemtsü.


England Test team jenjang mejungi aliba mapang Fleming-i tang McCullum ket nungi coach mapa agizükogo.

McCullum lenisüba nung England team-i mezüngbuba Test asaya 12 nungi 10 akok, saka iba sülen Test asaya 37 nung parnoki 17 akok aser 18 nung tamakok ngua liasü.

Parnoki 2024 küm December ita nungi tang tashi nung asaya aika asayaba asayamung ka danga koka mali.

Ashes nung Australia 4-1 agi makokba den New Zealand-a 2-1 agi makokba sülen McCullum mapa nungi anentsütsü telemetba agi, aser Stokes-ia NZ den tasembuba Test asaya tom nung pa asaya nungi anisüngzükerba sangdonga liasü.

CWG 2026: Mahadu-i gold aser Basil-i silver medal nguogo



100m nung toktepdar, saka pa 2022 Asian Para Games, Hangzhou nungbo tebur 400m T47 category nung asemteper aser gold medal ngua liasü.

Mohammed Basil Morssinganakath tang mezüngbuba international asayamung ka nung shilem agiba mapang silver medal ya ngutetogo. Kerala nungi arishi küm 21 tain asayar yagi Bengaluru National championships nung gold medal anguba sülen Glasgow nung asayatsü maongka nguteta liasü.

Dilip Gaviti gold medal anguba ya taküm iba asayamung nung India asoshi gold medal tasembuba liasü. Priyanka Dhankar aser Mirabai Chanu nati pei tata asaya nung gold medal ngur liasü.

Kasa mapang nung Murali Sreeshankar-ia tebur longjump asaya nung silver medal anguba sülen Bodhbarnü Indian athletics puti otsü nung pa tenüng zülüokogo. Pa ya linük nungi long jump asayar rongnung Commonwealth Games nung medal ana anguba mezüngbuba asayar kümogo. Pai

Birmingham 2022 nung silver medal anguba sülen Sreeshankar-i taküma iba asayamung nung silver medal nguogo. Pai 8.09m jukteta liasü.

Chiteni/July 30, 2026 (Agencies): India nung para-sprinters Dilip Mahadu Gaviti aser Mohammed Basil Morssinganakath nati Scotstoun Stadium nung tebur 100-meter T47 final nung gold aser silver medal nguogo.

Maharashtra nungi asemteper Gaviti alizüing 10.71 seconds nung tongteta gold medal angu aser iba category nung otsü tasen ka yangluogo.

Kasa asaya nung basil-ia 10.83 seconds nung alizüing tongteta silver medal nguogo.

Bengaluru nung 2026 küm May ita 8buba Indian Open International Para Athletics Championships nungbo Basil-i gold medal aser Gaviti silver medal angu, saka iba asayamung nungbo tena melentepogo.

Dilip Mahadu Gaviti ya tang

BILEMDANGANG

"Nai nüsasa dak tamang makatetra tangari nü dak koda tamang akatsü."